

Á MESA DO PARLAMENTO GALEGO

Eva Solla Fernández, Xabier Ron Fernández, Xosé Manuel Beiras Torrado, Juan Manuel Fajardo Recouso, Antón Sánchez García e Ramón Vázquez Díaz, membros do **Grupo Parlamentar da Alternativa Galega de Esquerda (EU-ANOVA)**, ao abeiro do recollido no artigo 155 do Regulamento da Cámara, presenta a seguinte **pregunta para a súa resposta oral en Pleno**, relativa a situación de desprotección social das persoas traballadoras en paro.

As máis de trinta normas en forma de leis e decretos leis contrarreformando o mercado laboral aprobadas polo goberno de Mariano Rajoy acentuaron ate o paroxismo a precariedade, a rebaixa salarial e a perda de dereitos das clases traballadoras, sen evitar a destrución de emprego e a falla de protección social para as persoas traballadoras no paro.

Cos datos do paro recollidos pola EPA do 3º trimestre do 2015, Galicia ten 162.935 persoas traballadoras en paro que non reciben ningunha prestación. Desa maneira, a taxa de protección sitúase no 26,8%, case doce puntos porcentuais menos que hai catro anos, no terceiro trimestre do 2011. Esa taxa de protección nas mulleres é inferior á dos homes en 8,7 puntos adicionais, ao punto que máis de oitenta e sete mil mulleres non reciben unha prestación. A desprotección social medra conforme a idade das persoas é máis nova: entre as persoas xóvenes menores de 30 anos só unha de cada quince percibe unha prestación, o 6,5%.

De se manter a mesma proporción de persoas en paro con prestación de hai catro anos, algo máis de 31.000 persoas recibirían hoxe unha axuda, a cal resulta fundamental para unha persoa traballadora cando se perde o posto de traballo a causa dunha crise-estafa multiplicada pola política austericida dos gobernos do PP.

A moi baixa taxa de protección ten dúas relacións causais básicas: a enorme taxa de temporalidade do mercado laboral no que a acelerada rotación para postos de traballo que en non poucos casos son estruturais impide acumulat períodos de cotización mínimos para acceder ás prestacións por desemprego; de resultas a maior temporalidade menor protección por desemprego. O gran incremento do paro de longa duración con taxas moi altas para as franxas de persoas que levan máis de 2 anos e máis de 4 anos no paro.

Así a Xunta de Galicia cometeu, nestes sete anos de goberno Núñez Feijóo, un delito social contra as persoas traballadoras en paro, un dos colectivos máis agredidos polos recortes. Logo dun setenio de vacas fracas, os gobernos Núñez Feijóo, foron quen de reducir un 51% os recursos adicados ás políticas activas de emprego, ao pasar de 420,9 a 205,4 millóns de euros. Así o programa 322-B destinado á intermediación e inserción laboral desapareceu, algo increíble nun país castigado polo paro como o noso.

O sistema de protección por desemprego é ineficaz e inxusto porque non serve ao seu obxectivo de protexer ás persoas no paro en situación de crise e recesión como as que vimos de sufrir. Lonxe de atender á necesaria ampliación o grao de cobertura xeral do sistema, os sucesivos gobernos –enfeudados a troika- non foron alén de pequenas actuacións temporais de carácter meramente asistencial.

Os gobernos do PP teñen atacado tanto ás políticas activas como as pasivas, ás referidas á protección. Ataques de clase porque a perda do posto de traballo supón o risco para unha persoa traballadora de caer baixo o limiar da pobreza e entrar nos procesos de exclusión social. Para impedir esa secuencia cómpre unha actuación alternativa da Xunta tanto no que atinxe ás políticas activas de emprego canto na protección social de maneira que as persoas non resten sometidas ao imperio tiránico e atroz do cálculo egoísta das forzas do mercado cuxa expresión son a pobreza e a exclusión social.

Polo referido, o grupo parlamentario da AGE formula a seguinte pregunta para a súa resposta oral no Pleno:

- Contempla a Xunta de Galicia instar do goberno central a ampliación do ámbito subxectivo da prestación de maneira que ningunha persoa rexistrada no paro reste sen dereito a unha prestación, cuxa contía e duración terá que ser digna para atender ás necesidades básicas da persoa?

En Compostela, a 18 de xaneiro do 2016.

Asdo. Eva Solla Fernández

Asdo. Xabier Ron Fernández

Asdo. Xosé Manuel Beiras Torrado

Asdo. Antón Sánchez García



Asdo. Juan Manuel Fajardo Recouso

Asdo. Ramón Vázquez Díaz

Asinado dixitalmente por:

Eva Solla Fernández na data 18/01/2016 12:56:15

Jose Javier Ron Fernandez na data 18/01/2016 12:56:22

Xosé Manuel Beiras Torrado na data 18/01/2016 12:56:27

Anton Sánchez García na data 18/01/2016 12:56:29

Ramón Vázquez Díaz na data 18/01/2016 12:56:31

Juan Manuel Fajardo Recouso na data 18/01/2016 12:56:33